



## RMANJ – MARTIN BROD

Grad je podignut kraj XIV ili početkom XV stoljeća na ušću Unca u Unu. Gradski bedemi porušeni su do temelja, a sačuvala se samo obla kula visoka oko 10 metara, u koje su etaže odvojene svodovima. U historijskim izvorima prvi put se spominje 1431. godine, kada ga je ugarski kralj Sigismund založio Nikoli Frankopanu. Udovica Anžu Frankopana je 1436. godine stanovala jedno vrijeme u Rmnju i potpisivala se kao kneginja Rmanjska. Sredinom XV stoljeća dobio ga je Juraj Frankapan. U ovom se gradu 1451. spominje „sudac“ i „bratstvo purgari“. Rmanj se spominje još 1504. godine među gradovima koje je trebalo popraviti i bolje utvrditi. Ubrzo poslije ovog posljednjeg spomena Rmnja grad je 1524. godine došao pod osmansku vlast. Da li je Rmanj razrušen još tada prilikom osvajanja ili kasnije, za sada nema podataka. U Konobi-Rmnju na Uncu spominje se 1386. godine katolički samostan i postoji mišljenje da je to bio benediktinski samostan, koji je poslije Hasan-paša Predojević predao pravoslavnim kaluđerima.

